





Mimi naifwa Joginda. Ni mwanafundzi kahi za sikuli mwenga ko Thezo iifwayo Ngerenya. Ni kilasi cha ne.



Dzina ra mwalimu muzhere wa sikuli yehu anaifwa
Mwalimu Sadiki.




Sikuli yehu ihehi sana na tsaka ra Arabuko Sokoke
ambaro mara nyinji nikukala huna bahathi ya
kuona ndzovu.





Rero mwalimu wehu muzhere adzaamua kungira kila kilasi ili anene na ahoho. Mwalimu wehu anahuhendza sana.







Adzazunguka tha mwishowe akafika kahi za
kilasi chehu cha ne. Adzihofika, kila muhoho
adzarungarara ili kumuheshimu mwalimu Sadiki.




Mwalimu Sadiki walamusa anafundzi kuno ana
raha sana kwa kukala kilasi chehu were k'akina
londzo here zho vingine.



Mwalimu wehu muzhere wahusifu sana na
akiamba kukala siswi huahoho adzo sana.



Kila mwanafundzi wasikira raha sana na
kumupigira makofi.




Badaye wamulagiza, musenangu Chogo ende ofisni mwakwe, ende akahale p'eremende.



Anafundzi osi marungarara na kuandza
kumuimbira maira.

“Huna muvera Mr. Sadiki
Huna muvera kwa p’eremende
Huna muvera kwa udzowo
Huna muvera Mr. Sadiki.”



Chogo wambola malo kuno ana raha sana.

Achenda ofisini kwa mwalimu Sadiki.



Mwalimu Sadiki wakudza hugazhira p'eremende.
Bada ya gaga, anafundzi osi maamba kukala
mandaenderera kukala na heshima na kuhenda
bidhii. Ii yakala siku mbidzo ya kukumbukira.